

PRK UMS berjalan lancar, siswa-siswi tunaikan kewajipan

KOTA KINABALU: Pembuangan undi Pilihan Raya Kampus (PRK) Universiti Malaysia Sabah (UMS) berlangsung dengan lancar di Kompleks Dewan Kuliah UMS.

Tinjauan media Canselori mendapati, siswa-siswi silih berganti untuk menunaikan kewajipan masing-masing.

Beberapa pelajar yang ditemui turut menyuarakan pandangan berhubung PRK kali ini selain harapan menggunung terhadap calon-calon yang bakal mendapat undian majoriti.

Bagi Mohamad Hafiz Kasroll, pelajar Program Geologi, Sekolah Sains dan Teknologi (SST), beliau menginginkan setiap calon yang akan menang menjalankan tanggungjawab dengan baik sebagai pemimpin pelajar selain bertindak sebagai jambatan penghubung kepa-

da pihak pengurusan UMS.

Beliau yang hadir berkerusi roda selepas terlibat dengan kemalangan jalan raya baru-baru ini turut mengalakkan siswa-siswi lain untuk hadir sama menunaikan tanggungjawab sebagai pengundi bagi memilih barisan kepimpinan pelajar sesi 2013/2014.

Sementara itu, seorang pelajar kelainan upaya (OKU), Wong Hui Yean menyifatkan sistem pengundian secara E-Voting amat memudahkan tanpa perlu mengambil masa yang lama.

Pelajar tahun satu, Program Psikologi Kaunseling, Sekolah Psikologi dan Kerja Sosial (SPKS) itu memberitahu, beliau hanya mengambil masa lima minit untuk menunaikan tanggungjawab sebagai pengundi.

“Saya berharap rakan-rakan yang lain juga

dapat turun beramai-ramai untuk sama-sama mengundi bagi memilih calon pilihan masing-masing,” katanya ketika diminta mengulas kehadiran pelajar yang turun mengundi pada sesi pagi.

Pendapat itu turut disokong oleh Nurul Jannah Yahya, pelajar tahun tiga, Program Fizik dengan Elektronik, SST.

“Mungkin para pelajar masih ada yang terlibat dengan sesi kuliah menyebabkan PRK pagi ini tidak semeriah tahun lalu. Namun, bagi saya, ini merupakan tanggungjawab penting untuk menentukan barisan kepimpinan yang terbaik bagi mewakili kami dalam menyuarakan sebarang cadangan, perkongsian atau masalah yang dihadapi kepada pihak pengurusan universiti,” ujarnya lagi.

Dalam pada itu, Elleiancly Yuli, pelajar

tahun tiga program yang sama pula berkata, setiap calon yang berjaya harus mampu membawa pelajar untuk sama-sama menyumbang kepada pencapaian dan kecemerlangan universiti.

“Jangan hanya menabur janji manis tetapi pada hakikatnya tidak mampu untuk menepatinya,” tegasnya lagi.

Sebagai rekod, UMS mempunyai 15,848 pelajar yang layak mengundi pada tahun ni. Proses pembuangan undi telah bermula sejak pukul 8.00 pagi dan akan berakhir pada jam 5.00 petang pada Khamis secara serentak di Kampus Induk dan Kampus Antarabangsa Labuan (KAL). Bagi UMS Kampus Cawangan Sandakan, kesemua calon telah diumumkan menang tanpa bertanding pada proses Penamaan Calon Isnin lalu.